



Barna- og unglingaráð Körfuknattleiksfélags Ísafjarðar

Skýrsla stjórnar barna- og unglingaráðs KFÍ starfsárið 2014-2015

Barna- og unglingaráð KFÍ veturinn 2014-2015 var skipað eftirtöldum einstaklingum: Birna Lárusdóttir, formaður, Guðfinna Hreiðarsdóttir, gjaldkeri, Heiðrún Tryggvadóttir, ritari, Júlíus Ólafsson, Guðný Alda Gísladóttir og Árni Heiðar Ívarsson.

Skýrsla þessi nær yfir tímabilið september 2014 til apríl 2015.

Flokkastarfið

Ekki var ráðinn yfirþjálfari yngri flokka á þessu starfsári og sáu fulltrúar BUR um flest þau verkefni sem að öllu jöfnu eiga að heyra undir yfirþjálfara. Ráðnir voru þjálfarar fyrir alla flokka strax í haust en nokkrar breytingar varð að gera snemma á tímabilinu vegna breyttra aðstæðna einstakra þjálfara. Miklu skiptir að til framtíðar verði horft til þess að ráða í stöðu yfirþjálfara yngri flokka félagsins til að tryggja meiri stöðugleika í þjálfun og samfellu milli einstakra flokka. Starfsárið gekk engu að síður vel og verður hér gerð grein fyrir helstu verkefnum vetrarins.

Æft var í sjö yngri flokkum í vetur: Krílakörfu (4-5 ára), krakkakörfu (1.-2. bekkur) minnibolta yngri stúlkna og drengja (3.-4. bekkur), minnibolta eldri drengja, minnibolta eldri stúlkna og 7.-9. flokki drengja (einn æfingahópur). Þrjár stúlkur úr 10. bekk æfðu og kepptu með meistaraflokki kvenna í vetur. Einnig gekkst KFÍ fyrir æfingum í íþróttahúsinu í Bolungarvík á laugardagsmorgnum í vetur og voru þær æfingar tvískiptar, 1.-2. bekkur og 3.-4. bekkur. Þessar æfingar gáfust vel og er góður grundvöllur til að halda þeim áfram næsta vetur.

Þrír flokkar tóku þátt í Íslandsmótum í vetur; 7.-9. flokkur drengja og báðir minnibolti eldri hóparnir, strákar og stelpur þótt drengirnir hafi orðið að draga sig úr keppni. Nánar verður vikið að einstökum flokkum hér á eftir.

Í yngstu aldurshópunum var áhersla lögð á tvö mót í minniboltanum, fyrra mótið var Sambíómót Fjölnis í byrjun nóvember og hið seinna Nettómótið í Reykjanesbæ í byrjun mars. Auk þess fór lítill hópur á Póstmót Breiðabliks.

Árangursríkar áherslur fyrra árs

Í fyrra var það sérstakt markmið stjórnar að taka fast á málefnum stúlknaboltans og tókst það vel. Öflugur hópur stúlkna er í minnibolta eldri og efnilegur hópur í minnibolta yngri fylgir þeim fast eftir. Nú æfa ríflega 100 börn hjá félaginu á aldrinum 4-17 ára og má segja að kynjahlutfallið sé nánast jafnt. Munar þar mestu um minnibolta eldri stúlkna þar sem 15

stúlkur æfa að jafnaði. Einnig hefur fjölgað nokkuð í hópi drengja í minnibolta og er það fagnaðarefni. Sömuleiðis er fjölmennt í Krílakörfunni sem ætluð er 4-5 ára börnum.

KFÍ og Íþróttaskóli HSV

Líkt og fyrri ár hefur KFÍ tekið þátt í starfsemi Íþróttaskóla HSV, m.a. með því að útvega þjálfara fyrir eldri börn skólans þegar körfubolti er þar á dagskrá. Brýnt er að KFÍ meti starfsemi og árangur Íþróttaskólans með tilliti til þess takmarkaða tíma sem körfuboltinn fær í skólanum. Grunnhugmyndafræði skólans er jákvæð og félagið hefur til þess stutt starfsemi hans en skólinn þarf að vera í stöðugri endurskoðun. Gæta þarf þess að hagsmunir KFÍ séu tryggðir þannig að eðlileg nýliðun geti átt sér stað hjá félaginu.

Aðstaða yngri flokkana

Yngri flokkar KFÍ hafa allir æft í íþróttahúsinu Torfnesi í vetur að undanskilinni Krílakörfunni og Krakkakörfunni sem eru til húsa í íþróttahúsinu við Austurveg. Æfingar fyrir börn í 1.-4. bekk voru settar á í íþróttahúsinu í Bolungarvík á laugardögum í vetur og hafa þær mælt mjög vel fyrir. Þær eru opnar öllum börnum á þessum aldri.

Þá er rétt að minnast á Íþróttaskóla KFÍ á Torfnesi á laugardögum, sem hefur verið undir stjórn Árna Heiðars Ívarssonar íþróttakennara í vetur líkt og marga undanfarna vetur. Skólinn er ætlaður börnum á leikskólaaldri. Þó svo að skólinn heyri ekki beint undir BUR þá starfar hann í nafni KFÍ og kunnum við Árna Heiðari bestu þakkir fyrir hans frábæra starf á undanförunum árum.

Búningar

Í haust var ákveðið að láta útbúa utanyfirgalla fyrir yngri flokkana sérmerktu KFÍ. Þetta eru svartar og rauðar jogging hettupeysur ásamt svörtum buxum og voru gallarnir tilbúnir fyrir jólin. Mæltust gallarnir vel fyrir og langflestir iðkendur fjárfestu í einum slíkum. Allir þjálfarar yngri flokka fengu einnig gefins peysu. Gallarnir voru keyptir í gegnum Henson þar sem þeir voru merktir og síðan seldir til iðkenda á kostnaðarverði.

Yngri flokkarnir hafa nú spilað þrjú ár samfleytt í svart/hvít/gulu keppnisbúningum félagsins og í haust var ákveðið að stefna að endurnýjun þeirra haustið 2015. Beðið er með frekari undirbúning þessa verkefnis þar til fyrir liggur hvort verður af sameiningu íþróttafélaga á norðanverðum Vestfjörðum, en vikið verður að því síðar í skýrslunni. Nýir búningar verða væntanlega eins fyrir allan körfuboltann, allt frá meistaraflokkum niður í Krílakörfu.

Uppákomur í vetur

Vetrarstarfið hófst með Körfuboltadegi sem fram fór að morgni laugardagsins 6. september þar sem starfsemi yngri flokkanna og æfingataflan voru kynnt og brugðið á leik með leikmönnum meistaraflokks karla. Boðið var uppá hollar og góðar veitingar og var þátttaka góð. Körfuboltadagurinn í upphafi vetrar er einn besti vettvangurinn til að bjóða mögulega nýja iðkendur velkomna og kynna þá fyrir starfi félagsins.

Jólaþarfa á aðfangadag var á sínum stað þótt erfiðara hefði reynst að fá tíma í húsinu en mörg undanfarin ár vegna breyttra reglna um viðveru starfsmanna í húsinu þegar viðburðir fara þar fram.

Körfuboltadagur númer tvö var síðan haldinn 10. janúar, einskonar mini-körfuboltabúðir þar sem leikmenn beggja meistaraflokkanna sáu um skipulag æfinganna. Í fyrra var um að ræða tveggja daga búðir en plássleysi í íþróttahúsinu olli því að aðeins var um einn dag að ræða í ár.

Síðustu helgina í febrúar heimsótti Borce Ilievski, fyrrverandi þjálfari KFÍ, félagið og stóð fyrir vel heppnuðu eins dags körfuboltanámskeiði fyrir KFÍ krakka á aldrinum 10-16 ára. Kunnum við honum bestu þakkir fyrir en hann þáði engin laun fyrir greiðann. Námskeiðið sýndi okkur fram á gagnsemi þess að brjóta vetrarstarfið upp með heimsóknum þjálfara utan okkar raða.

Í vetur hafa þjálfarar yngri flokka fengið að heimsækja leikfímistíma barna í flestum árgöngum Grunnskólans á Ísafirði til að kynna körfuboltaíþróttina. Erfitt er að segja hvort sú kynning hefur skilað sér beint í fjölgun iðkenda en það er mat stjórnar BUR að öll kynning sé af hinu góða og gagnleg til að halda merkjum körfunnar á lofti. Einnig dreifðum við í tvígang kynningarmiðum í Grunnskólanum í Bolungarvík til að vekja athygli á starfsemi KFÍ og höfum fengið að koma tilkynningum á framfæri á foreldravefinn þeirra. Í þessu samhengi má nefna að öll foreldrasamskipti yngri flokka KFÍ fara nú fram í einstökum facebook hópum auk þess sem við erum með opnu síðu fyrir sem kallast KFÍ yngri flokkar. Tölvupóstsamskipti eru því sem næst aflögð og telur BUR þetta fyrirkomulag ganga vel upp enda nýta langflestir foreldrar sér þetta samskiptaform.

Um miðjan mars stóð félagið fyrir litlu körfuboltamóti ætlað börnum í 1.-4. bekk, einkum þeim börnum sem eru í íþróttaskóla HSV og höfðu verið að æfa körfubolta vikunnar á undan. Shiran Þórisson, formaður KFÍ, hafði umsjón með mótinu en hann sá um æfingar eldri iðkenda skólans í vetur.

Páskaeggjamót KFÍ var á sínum stað á skírdag, en það er ætlað jafnt börnum sem fullorðnum. Mótið tókst vel og var haldið í bland við kökubasar og kaffihús BUR.

Krílakarfan verður starfrækt út apríl og mun henni ljúka með skemmtilegum uppákomum á síðustu æfingu. Einnig er fyrirhugað lítið laugardagsmót í Bolungarvík í byrjun maí fyrir þau börn sem hafa æft þar í vetur.

Uppskeruhátíð yngri flokkanna verður haldin á Torfnesi 21. maí og þar með lýkur æfingum vetrarins en fyrirhugaðar eru sumaræfingar sem verða auglýstar betur þegar nær dregur. Þær hefjast þó ekki fyrr en að afloknum Körfuboltabúðum KFÍ í júní. Undirbúningur þeirra er kominn vel á veg en þrír fulltrúar úr stjórn BUR eiga sæti í framkvæmdastjórn búðanna. Þær fara fram 2.-7. júní n.k. og verður Borce Ilievski yfirþjálfari búðanna þetta árið.

Hvert skal stefna?

Ljóst má vera að eitt helsta verkefni BUR er að skapa þá umgjörð um körfuboltann sem laðar að sem flesta iðkendur. Stjórn BUR telur að lykkillinn að því að gera betur í þeim efnum sé að ráð dugmikinn yfirþjálfara yngri flokka sem tæki allt utanumhald föstum tókum. Enginn slíkur hefur verið starfandi við félagið um langt árabíl. Góðir áfangasigrar náðust á síðasta ári í fjölgun iðkenda og tókst að fylgja því ágætlega eftir í vetur en betur má ef duga skal, ekki síst í ljósi þess að elstu aldurshóparnir eru orðnir svo þunnskipaðir að ekki næst að manna lið. Áskorun BUR frá því í ársskýrslum síðustu tveggja ára á því enn við: Við skorum á alla þá sem koma að starfi KFÍ að taka höndum saman svo takast megi að fjölga iðkendum enn frekar í okkar ágætu íþrótt.

Samhliða fjölgun iðkenda er mikilvægt að huga að þjálfunarþættinum. Félagið þarf á mörgum öflugum þjálfurum að halda til að standa undir fleiri flokkum. Liður í því er að hvetja eldri iðkendur til að sækja þjálfaranámskeið sem í boði eru á vegum ÍSÍ. Ljúki þjálfari námskeiði greiðir BUR námskeiðsgjöldin. Námskeiðin veita einnig einingar í framhaldsskólum og eru þannig enn frekari hvatning. Nokkrir krakkar hafa þegar nýtt sér þetta eða hafa í hyggju að gera það. Einnig er mikilvægt að styðja við bakið á þeim sem vilja sækja dómarnámskeið sem í boði eru á vegum KKÍ.

Undirbúningur að stofnun deildaskipts íþróttafélags á norðanverðum Vestfjörðum er langt á veg kominn með þátttöku KFÍ og fleiri félaga. BUR bindur miklar vonir við að slík sameining skjóti styrkari stoðum undir starfsemi íþróttageinanna á svæðinu og geri þeim kleift að nýta samlegðaráhrifin í rekstri til góðs fyrir samfélagið í heild.

Fjáröflun

Fjáröflun BUR hefur verið með hefðbundnu sniði í vetur. Stór þáttur í því er að reka og manna sjoppu á heimaleikjum meistaraflokka félagsins. Einnig höfum við haft sjoppuna opna þegar umferðir í Íslandsmóti hafa fengist hingað heim. Hagnaður af sjoppurekstrinum hefur runnið beint í ferðasjóð iðkenda vegna ferða á Íslandsmót og minniboltamót og hefur okkur tekist að greiða ferðir nokkuð vel niður.

Líkt og fyrri ár voru seld batterí í reykskynjara fyrir jólin ásamt kaffipakkasölu. Í janúar sá félagið um kaffiveitingar fyrir Ísafjarðarbæ vegna Íþróttamanns Ísafjarðarbæjar. Þá hefur BUR ásamt stjórn KFÍ mannað veitingasölutjaldið á „Aldrei fór ég suður“ hátíðinni í mörg ár auk þess sem ráðið hefur nú í þriggja staðið fyrir rekstri kaffihúss og kökubasars á skírdag í tengslum við Páskaeggjamót KFÍ. Einnig má nefna að fulltrúar úr BUR vinna nú að undirbúningi Körfuboltabúða KFÍ 2015 í samstarfi við fulltrúa úr aðalstjórn og gengur sá undirbúningur ágætlega en búðirnar eru ein stærsta fjáröflun KFÍ sem ráðist er í á hverju ári.

Þá eru ótalin fjölmörg fyrirtæki sem styrkja starfsemi yngri flokkanna með ýmsum hætti og eru framlög þeirra ómetanleg. Sérstaklega má nefna fyrirtæki á borð við Samkaup, Bakarann, Gamla Bakaríið, Heildsölu Hafsteins, Pólinn, H-prent og Orkubú Vestfjarða ásamt Te og Kaffi.

Æfingagjöldin eru innheimt mánaðarlega af iðkendum í 5. bekk og eldri og renna þau til reksturs flokkanna, sér í lagi greiðslu þjálfaralauna. Gjöldin duga þó ekki fyrir þjálfaralaunum jafnvel þótt nokkrir þjálfarar í yngstu aldurshópunum gefi nær alla vinnu sína til félagsins. Félagið verður af umtalsverðum tekjum með því að innheimta ekki æfingagjöld í yngstu

aldurshópunum en benda verður á að í samkomulagi HSV og félaganna var ákveðið að heimila æfingar fyrir íþróttaskólaaldurinn gegn því að ekki yrðu innheimt æfingagjöld. Kríllakarfan hefur frá upphafi verið gjaldfrjál og það er mat stjórnar BUR að svo eigi að vera áfram.

Einstakir flokkar.

Stúlknaþópur:

Einungis fimm stúlkur á aldrinum 15-18 ára æfðu með félaginu í vetur og mynduðu þær meistaraflokk kvenna. Fenginn var spilandi þjálfari frá Bandaríkjunum, Labrenthia Murdock, ásamt því að gerður var venlasamningur við Breiðablik um þrjá leikmenn og tryggði liðið sér þriðja sætið í 1. deild kvenna. Meistaraflokkur kvenna er ekki á forræði BUR en þar sem þrjár af stúlkunum eru enn í grunnskóla og sumar þeirra höfðu tekið körfubolta sem val í skólanum fylgdist BUR með framvindu þeirra. Því miður er ekki útlit fyrir að hægt verði að manna meistaraflokk kvenna næsta vetur.

7-9. flokkur drengja:

Þjálfari: Kjartan Helgi Steinþórsson (sept.-nóv.) Nebosja Knezevic.

Styrktarþjálfari: Árni Heiðar Ívarsson

Flokkurinn lék í D-riðli 9. flokks og eru flestir drengirnir að spila upp fyrir sig ýmist um eitt eða tvö ár. Einn drengur úr 10. bekk spilar með hópnum og höfum við fengið undanþágu fyrir hann fyrir öll mót. Árangur drengjanna var ágætur með hliðsjón af aldursdreifingunni og voru þeir oftast næstefstir í riðlinum þótt ekki tækist að koma liðinu upp. Þeir hefja því leik í D-riðli næsta haust. Þetta er áhugasamur, þéttur og góður hópur tíu drengja sem hafa flestir æft saman um langt árabíl. Með góðu og faglegu utanumhaldi eiga þessir strákar að geta gert góða hluti í framtíðinni. Mikilvægt er að skoða hvort hægt er að fjölga iðkendum á þessum aldri til að skapa stærri æfingahóp. Góður og samstíga foreldrahópur hefur staðið að strákunum alla tíð.

Árni Heiðar Ívarsson sá um styrktaræfingar einu sinni í viku fyrir hópinn og kunnum við honum bestu þakkir fyrir alla aðstoðina en hann þáði ekki laun fyrir sína vinnu.

Minnibolti eldri drengja:

Þjálfarar: Kjartan Helgi Steinþórsson og Haukur Hreinsson (sept.-nóv.)

Florijan Jovanov og Gunnlaugur Gunnlaugsson Jr.

Fáir drengir komu upp úr minniboltahópnum félagsins frá síðasta vetri og því var ákveðið að styrkja hópinn og bjóða nýjum drengjum úr minnibolta yngri að æfa með hópnum. Þeirra á meðal eru nokkrir Bolvíkingar en fyrir var einn eldri Bolvíkingur. Það hefur gengið ágætlega á æfingum en aldursbilið er þó fullmikið í keppni en strákarnir eru í 3.-6. bekk. Liðið var skráð í Íslandsmót en varð að draga sig úr keppni fyrir aðra túrningu þar sem ekki náðist að manna liðið. Farið var á þrjú minniboltamót; Sambíómótið, Póstmót Breiðabliks og Nettómótið þar sem strákarnir stóðu sig sérlega vel. Það er mikill kraftur í þessum hópi og með rétttri þjálfun í bland við mátulega skemmtun er þessum unga hópi allir vegir færir. Einnig eru foreldrar mjög áhugasamir og hafa þegar komið að ýmiskonar skipulagningu í tengslum við hópinn.

Minnibolti eldri stúlkna:

Þjálfari: Labrenthia Murdock, Eva Margrét Kristjánsdóttir og Rósa Överby um miðjan vetur.

Þetta er annar æfingavetur þessa öflugna stúlknaþóps úr 5. og 6. bekk en hann kom allur nýr inn í fyrrahaust. Allt að 15 stúlkur æfa að staðaldri og tókst að tefla fram tveimur liðum í fyrstu þremur fjölíðamótum vetrarins með aðstoð tveggja fyrrverandi liðsmanna úr Reykjavík. Ákveðið var að sameina þær í einu liði fyrir síðasta mót vetrarins nú í apríl til að þetta raðirnar betur. Þær hafa keppt í B og C riðli í vetur og unnu alla sína leiki í C-riðli um síðustu helgi og hefja því keppni í B-riðli næsta haust. Yngri stelpurnar í hópnum tóku einnig þátt í Nettómótinu í mars. Hér er á ferðinni afar sterkur og efnilegur hópur og líkt og með strákahópna tvo er hann líklegur til afreka ef rétt er staðið að þjálfun og utanumhaldi. Foreldrar eru líka virkir í þessum hópi en hlutverk foreldra í því að skapa góða umgjörð um æfingahópna verður seint ofmetið.

Minnibolti yngri drengir:

Þjálfarar: Pance Ilievski og Rósa Överby

Upphaflega stóð til að hafa stráka og stelpur saman á æfingum í þessum aldurshópi. Fljótlega var fallið frá því og þeir strákar sem áhugasamastir voru í þessum hópi voru fengnir að láni yfir í minnibolta eldri. Fljótlega voru þeir nær allir komnir yfir á æfingar eldri drengjanna og virtust skemmta sér hið besta. Af þessum sökum hefur ekki verið um formlegt lið að ræða í minnibolta yngri en þeim hefur þó staðið til boða að keppa á þremur minniboltamótum í vetur; Sambíómótinu, Póstmóti Breiðabliks og Nettómótinu. Í þessum hópi er að finna mjög sterka körfuboltastráka sem geta hæglega dregið að fleiri stráka og myndað góðan æfingahóp næsta vetur en þá er nauðsynlegt að afmarka aldursbilið aðeins betur. Þarna er einnig að finna áhugasaman foreldrahóp sem þegar hefur lagt mikið af mörkum við skipulag starfsins.

Minnibolti yngri stúlkur:

Þjálfarar: Pance Ilievski og Rósa Överby

Hér er á ferð góður kjarni af áhugasömum stelpum, 6-8 talsins, sem tók stórstígum framförum í vetur. Þær mættu á tvö mót; Sambíómótið og Nettómótið og var virkilega gaman að sjá frammistöðu þeirra í síðasta leik vetrarins á Nettómótinu. Þær æfðu hinsvegar aðeins einu sinni í viku og er brýnt að endurskoða það fyrirkomulag fyrir næsta vetur. Það má því segja að þessi hópur hafi ekki setið við sama borð og jafnaldrar þeirra í minnibolta drengja sem æfðu með eldri drengjunum í vetur og fengu fyrir vikið mun fleiri æfingar. Enn og aftur er ástæða til að nefna foreldrana en þeir hafa sinnt hópnum vel í vetur.

Krakkakarfan:

Þjálfarar: Guðni Ólafur Guðnason og Lilja Júlíusdóttir.

Krakkakarfan samanstendur af börnum í 1.-2. bekk, bæði strákum og stelpum. Hátt í 10 börn eru skráð í hópinn en æfingar eru aðeins einu sinni í viku á Austurvegi og sjaldan sem allir eru mættir í einu. Nokkrir krakkar úr þessum hópi tóku þátt í Nettómótinu og var einstaklega gaman að sjá baráttuþrekið í okkar fólki. Í þessum hópi eru nokkrir eldheitir körfuboltamenn og er mikilvægt að leita leið til að stækka hópinn til að gera æfingarnar enn skemmtilegri.

Krílakarfan:

Þjálfarar: Sigríður Guðjónsdóttir og Rósa Överby.

Góð þátttaka var í Krílakörfunni í vetur líkt og í fyrra enda stóð Sigríður afar vel að öllu utanumhaldi með aðstoð Rósu. Á þriðja tug barna er á skrá í Krílakörfunni en æft er einu sinni í viku á Austurvegi. Mikil stemming er í þessum hópi, margir hafa fjárfest í KFÍ búningi og ljóst að þarna liggja tækifæri í uppbyggingarstarfi félagsins. Engin æfingagjöld eru innheimt í þessum hópi enda er litið svo á þarna sé um kynningarstarf að ræða sem skili sér í fleiri iðkendum KFÍ í framtíðinni.

Lokaorð

Þegar þetta er sett á blað er útlit fyrir að yngri flokkar Körfuknattleiksfélags Ísafjarðar hafi í vetur leikið sína síðustu leiki undir merkjum þessa rótgróna félags. Í næsta mánuði, 2. maí, verða fimmtíu ár liðin frá stofnun KFÍ. Í þeim mánuði er einnig fyrirhugað að leggja KFÍ niður í þeirri mynd sem við þekkjum ef fyrirætlanir um stofnun nýs íþróttafélags ná fram að ganga. Það fylgir því óneitanlega tregablandin tilfinning að hugsa sér að enginn muni spila undir merkjum KFÍ að hausti. En því fylgir að sama skapi mikil tilhlökkun ef okkur tekst að koma nýju félagi á laggirnar, félagi sem mun án alls vafa standa sterkari fótum en fyrirrennarar þess.

Samhliða því að taka þátt í að byggja upp nýtt félag þarf körfuboltahreyfingin á Ísafirði að vinna samhent að því tryggja hagsmuni okkar innan sérsambandsins KKÍ. Þarfir féлага utan af landi eru ólíkar þörfum þeirra sem starfa á höfuðborgarsvæðinu og þar vegur ferðakostnaðurinn að sjálfsögðu þyngst. Sérsambandið verður að leita allra leiða til að komið verði betur til móts við þau félög sem bera þyngstan ferðakostnað. Þar skiptir t.d. máli að ferðasjóður ÍSÍ sé skipulagður með öðrum hætti en nú er. Við fundum það á eigin skinni í vetur að ferðakostnaðurinn hefur aukist verulega frá því sem var fyrir aðeins einu til tveimur árum. Í fyrra voru hugmyndir uppi um breytt mótafyrirkomulag yngri flokka sem gæti mögulega dregið úr þessum kostnaði en ekkert bólar á þeim breytingum.

Núverandi stjórn barna- og unglingaráðs KFÍ mun ekki láta sitt eftir liggja í hagsmunabaráttunni fyrir okkar ágætu íþrótt. Við viljum fylgja körfunni vel eftir inn í mögulegt nýtt íþróttafélag og við köllum eftir fleirum til að vinna að þeim málum með okkur. Að endingu færum við öllum iðkendum, þjálfurum, foreldrum og styrktaraðilum okkar bestu þakkir fyrir farsæla samvinnu á starfsárinu sem nú er að ljúka.

Ísafirði, 14. apríl 2015

Fyrir hönd stjórnar barna- og unglingaráðs KFÍ,

Birna Lárusdóttir
formaður